

Finanziaziun da las baselgias resta tema actual

■ **(anr/fa) Sco dumandà da la fracziun da la pld ha la regenza preschenta in rapport davart la finanziaziun da las baselgias chantunalas. Ella propona da mantegnair il status quo.** «Religiun e cretta giogan en Grischun vinvant ina rolla impurtanta», ha ditg il president da la cumissiun predeliberanta *Maurizio Michael* (pld, Bergiaglia) ier avant che tractar il rapport davart la finanziaziun da las baselgias en Grischun, «87 pertschient da la populaziun chantunala fan part d'ina baselgia.» Il pli ferm represchentada èn cun 44 pertschient la baselgia catolica e cun 35 pertschient la baselgia evangelic-reformada. Causa lur posiziun dominant vegnan las duas baselgias reconuschidas en la constituziun grischuna sco corporaziuns da dretg public. «Las duas baselgias chantunalas vegnan finanzadas dad ina vart cun la taglia da baselgia e da l'otra da la taglia da cultus», ha cuntinuà Michael e menziunà l'iniziativa che vuleva l'onn 2012 abolir la taglia da cultus. Quella ha però fatg naufragi cun bundant 73 pertschient da las vuschs.

Lauds per il rapport da regenza e baselgias chantunalas

Il commember da la cumissiun *Ilario Bondolfi* (pcd, Cuir) ha menziunà la funcziun sociala da las baselgias: «Ellas fan lavur pastorala per la giuventetgna e las persunas attempadas, en ospitals ed en praschuns. Sch'il chantun avess da surpender quella lavur dess quai gronds custs.» Causa ch'il dumber da commembers da las duas baselgias chantunalas sa diminuescha pli e pli crescha tenor il president da la cumissiun il ristg finanziel per ellas. Perquai aveva la pld incumbensà la regenza da preschentar il rapport che preschenta la situaziun actuala e dat ina survista da mesiras pussaivlas per segirar la finanziaziun. La regenza ha fatg quai ensemen cun represchents da las duas baselgias chantunalas. Quel rapport ha survegnì lauds da las deputadas e dals deputads che han prendì il pled. I saja in rapport che dettia ina buna survista da la situaziun actuala e dal futur da las baselgias, han els ditg.

Parlament er perencletg cun conclusiun, però...

«Mantegnair il status quo tar la finanziaziun da las baselgias ha pli grond potenzial che d'introducir novas variantas intschertas», ha menziunà il president da la regenza *Martin Jäger* il facit dal rapport. Deputà *Urs Marti* (pld, Cuir), *Silvia Casutt-Deungs* (pcd, Glion) ed auters han però rendì attent a las grondas sfidas futuras per las baselgias, p. ex. causa la mancanza da commembers, l'interess sminuint per l'instrucziun da religiun ed auter pli. I saja perquai necessari da tegnair en egl permanentamain la situaziun da las baselgias, han els ditg, «per pudair uschia agir proactivmain e betg mo reagir.» Il tema finanziaziun da las baselgias vegnia ad occupar il cussegl grond er en avegnir puspè, ha concedì cusseglier guvernativ *Martin Jäger*. Cun 106 a 0 vuschs e naginas abstenziuns da la vusch ha il cussegl grond prendì enconuschientscha dal rapport da la regenza e da las baselgias chantunalas.